

Doppelmoral?

Hei ass ee bemierkenswäerten Artikel aus der taz : <https://taz.de/Israels-Krieg-in-Gaza/!5981361/>

Dës Offenheet an dës Mënschlechkeet, dësen humanisteschen Engagement hätt ech mir vun eise Politiker a vun all eise Medien an de leschte Méint erwaart.

D'ganz Welt weess méttlerweil Bescheed iwwer d'Verbrieche géint d'Mënschlechkeet, deen de „Rechtstaat“ Israel un de Palestinenser säit Joerzénge begaangen huet an nach weider begeet.

Honnerte vu Milliounen Mënschen an der ganzer Welt protestéieren. Judden an der ganzer Welt skandéieren "Not in our name" a verdamen Israel fir seng Verbriechen um palestinensesche Vollek.

Et handelt sech hei em eng "affaire de centenaire", der Wäert an d'Geschichtsbücher anzegoen.

Mee eis Politiker an eis Medien halen sech zréck.

Esou vill Zréckhalung an Asymmetrie bei medialen Narrativen a bei politesche Reaktiounen an Handlungen hunn ech bei kenger aneren humanitäre Katastroph an deem beschämende Mooss erlieft.

De politeschen Asaz fir d'Ukrain an d'Berichterstattung iwwer déi Aggressioun ass wichteg a moralesch richtig, well et do och em eng onschëlleg Zivilbevölkerung geet.

Mee firwat net och deeseweschten Asaz, deeseweschte Narrativ an déisewescht Berichterstattung am Fall vum Gaza? Sinn d'Mënschen am Gaza dat net Wäert? Well si ekonomesch, geopolitesch a geostrategesch net esou interessant sinn?

De Mord un onschëllege Mënschen, dovunner d'Hallschent Kanner, de Masmord am Gaza ginn einfach stëllschweigend toleréiert. Firwat?

Dat ass net méi just ee Krich géint d'Hamis, esou wéi d'Medien et duerstellen am Aklang mat der Versioun vun enger riets-extremisteschen a krimineller israelescher Regierung, mee et ass eng massiv a flächendeckend Exterminatioun an een absichtlecht Verdreiwe vun engem ganze Vollek! Et ass genozidär.

Dat Ganzt ass premeditéiert fir de Gaza am Endeffekt un Israel z'annexéieren. Wat och kloer esou vun israelesche Ministere ugekënnegt ginn ass.

“Toutes les vies humaines se valent”.

Wéi kënnen eis Politiker a Medie an esou engem Fall „Neutralitéit“ affichéieren? Bei dësem massenhafte Mord un onschëllege Mënsche? Wann déi ëffentlech Medie nach iwwer Mënschlechkeet sollte verfügen, sollte si hiren Narrativ an dëser Saach revidéieren an änneren.

Oder si mir definitiv an enger Doppelmoral gefaangen?

Et gëtt keng "Neutralitéit" wann et sech em planifizierte Mord un engem Vollek oder em seng Verdreiung handelt, wann et em Mënschlechkeet geet. An dat gëlt net just fir d'Ukrain. Entweder et steet een generell zur Mënschlechkeet oder net.

D'Palestinenser hunn dat Pech keen ekonomeschen Impakt op de Welthandel a keen "intérêt géopolitique ou géostratégique" ze hunn. Soss wieren eis Politiker, an och eis Medie, scho längst fir si intervenéiert. Wéi fir d'Ukrain. A wéi fir d'Populatioun an engem Apartheid-Regime a Südafrika.

De Verdikt vum Internationale Geriichtshaff zu Den Haag ass enttäuschend. Kee Stopp vun de mäerderesche Militäraktiounen. Keen dauerhafte "cease-fire", fir deen op der ganzer Welt skandéiert gëtt.

Firwat ginn et keng Sanktioune géint Israel wéi géint Russland? Firwat ginn d'Ambassadeuren net symbolesch zréckgezunn? Wat huet dat palestinesescht Vollek verbrach fir säit 8 Joerzénge därmoose mësshandelt an humiliéiert dierfen ze ginn? Ouni iergendwellech tatkräfige Interventioune vun der Weltgemeinschaft fir géint d'Oppressioun an dat Leide vun dësem Vollek ze wierken?

Ech schomme mech fir déi soi-disant ziviliséiert westlech Regierungen a Medien. Fir déi Komplizitéit mat engem soi-disant "ziviliséierte" Verbündeten/Vorpostenstaat am Noen Osten.

Et geet schlussendlech em Mënschlechkeet an em Gerechtegkeet. Et geet em "Menschenwürde" an em Mënscheliewen! Dozou sollte Politiker a Medien an hirem Narrativ stoen. Onofhängeg vun allen aneren Aflëss.

Et geet em een dauerhaften "Cease-fire", em humanitär Hëllef fir ee stierwend Vollek, an em seng Existenz. An et geet dorëm fir eng viabel Solutioun fir béid Vëlker ze fannen, op diplomateschem Wee an net mat Waffengewalt. Ouni de Nährbuedem fir Haass an Terror weider ze stäerken.

D'Geschicht braucht net nach ee Genozid.

Mehmed Özen  
L-7513 Miersch